

Cianta con nos 2012

Sies cors da duta la Ladinia ves speta a Cianacei en sabeda ai 12 de mei da les 3 domesdi tl Chino Marmolèda



Retrat da l'ultima edizion te Fascia dl festival di Mutons dla Ladinia.

Atualité - Passa 200 de pitli ciantors ladins s'abinarà doman, 12 de mei, tl Chino de Cianacei, per la XIV edizion dl "Cianta con nos". La manifestazion, che vegn metuda a jì vigni doi agn, é nasciuda dl 1985 da na idea de Carlo Willeit, che fova enlaouta vizepresident dl'Union Generela di Ladins dla Dolomites: n festival di cors di picioi de duta la Ladinia, che se abine senza competizion per vive n moment duc ensema, imparé de se conesce mingol de plu soura i joufs fora, imparé y scuté su cianties tl ladin dles vals vejines.

Anter les manifestazions interladines deserentes, desche l Ladinatour, i Dis culturai, i Dis de leteratura, che é nascius ti agn y s'à morenté ju, à l "Cianta con nos" ciamò tegnù bot, sceben con auc y basc, y ence chest ann s'à l'Union di Ladins de Fascia cruzié de l

organisé a la mioura.

Al é na idea y na scomenciadia dret bela y plajoula, che é fora per i agn steda l'ocajion per smaori, y valch outa ence slargé fora da na val a l'autra, l repertore de cianties per ladin per i picioi, y à porté pro a fé conesce te dutes les cinch valedes l Inn Ladin "O Ladinia, nosta tieria", che Graziano Grossrubatscher à scrit dl 1987 apontin per chesta manifestazion, y che sona via da enlaouta encà vigni edizion, cianté da duc i cors deberieda.

Chest ann a Poza tolarà pert sies cors, con n pice desplajei che degun cor ne ruvarà da la Val Badia. Al sarà da vedei y audi sun paladina l Cor di Bec da Poza, mené da la maestra Maura Zanon, che à tout pert a de plu edizioni dl "Cianta con nos", y dapò l Cor di Tosac de Fodom con la maestra Martina

Gardin, l Cor di Mutons de Sëlva sot la bacheta dl maester Paul Senoner - ence el é na "colona" de chesta manifestazion, l Cor di Tosac da Moena con la maestra Annarosa Pederiva, la Ójes de Anpezo de ra Scora Popolare con l maester Marino Baldissera y l Cor de la Scola de Musega "Il Pentagramma", arvenù dal maester Ilario Defrancesco, che é da egn n muie vejìn al Cianta con nos ensema con chesta Scola de musega de Fiem y Fascia.

I ves speton donca trueps a Cianacei, da les 3 domesdi, per passé adum valch ora de legrezza con de beles oujes ladines, y parti ence n moment de solidarité con l'assoziazion Bambi, che deida i mutons amarés y sies families, y che enjgnarà con sies volontadives na bela "pizza party" per duc i ciantors a la fin dla manifestazion.